



Kajumissutsiminnik suleqataasut sulerisinnaappat?

Soqutigisaqarfiit tamarmik suliassartaqarput – timersortartunut nerisassanik sassaalliinermiit kajumissutsiminnik suleqataasunik kiffartuussinnermut, unammiaarnerit ingerlanneqarnerini angusanik nalunaarsuinnermut allarpasuillu. Suliassat assigiinngiaartorujussuupput, kajumissutsiminnillu suleqataasut suliassat sorliit suliarissanerlugit namminneq aalajangeeqataaffigisinnaavaat. Kikkut tamarmik assigiinngitsutigit suleqataasinnaapput. Tuluttut oqalussinnaanissaq pisariaqanngilaq.

Matumani naatsumik oqaluttuarineqarput, suleqatigiit assigiinngitsut Nuummiittussat, unammiaarnerit ingerlanneqarnerini kajumissutsimik suleqataaffigineqarsinnaasut.

Team Promotion

AWG2016-i pillugu paasissutissat nutaarsiassallu aviisitigit, internettikkut aamma AWWG2016-ip atuagassiaatigit Ulu Newsikkut atuarneqarsinnaassapput. Kajumissutsimik suleqataasut AWWG2016-i pillugu paasissutissiisussat, nalunaaruteqartartussat nutaarsiassanillu siammarterisussat peqatigissavaat. Ilaatigit suliassaassapput allanneq, tusagassiuuteqarfinnik kiffartuussineq aamma tikeraat illoqarfiup iluani pisariinnerusumik sumiissusersiorsinnaanerit anguniarlugu allagartalersuineq.


Team Culture

Kulturikkut, takutitsinikkut aamma peqatigiilluni sammisassaqaartitsinerit soqutigigaanni taava Team Culture kajumissutsimik suleqataaffigissallugu naleqqutuuvoq. Peqataasut nunanit suminngaanneerterat, kulturiat, suaassusiat aamma timersuutaat apeqqutaatinnaqit ataatsimoortinneqarnissaat kulturikkut sammisassaqaartitsinerit siunertaraat. Kulturikkut sammisassaqaartitsinerit sutigit tamatigit iluatsinnissaat kajumissutsiminnik suleqataasut peqataaffigissavaat, aamma assersuutigalugu ammaanersiornermi, naggataarnersiornermi, peqataasut sammisassaqaartinneqartarneranni, medaalianik agguaassinernik oqaluttaanermillu suliaqassallutik.



Team Communication/IT aamma Team Project

Unammiaarnerit ingerlanneqarnerisa nalaanni teknikkikkut atortulersuutit ajunngitsumik ingerlassapput. Suleqatigiinni taakkunani kajumissutsiminnik suleqataasut ilaatigut unammiaarnerni angusanik tigooraasuullutik, pitsaasutsimik qulakkeerinnillutik aamma angusanik nalunaarsuillutik suliaqarsinnaapput, kiisalu IT-eqarnikkut attaveqatigiinnikkullu suliaassanik ikiuullutik.



Team Volunteer

Kajumissutsiminnik suleqataasunut ataatsimoorneq aamma ataatsimooqatigiinneq salliutinneqarpoq. Team Volunteerimi kajumissutsiminnik suleqataasut kajumissutsiminnik suleqataasunut atugassarititaasut sunniuteqaqataaffigisinnaavaat, ataatsimoorluni sammisaqaqatigiinnernik aaqgissuussinikkut aamma kajumissutsiminnik sulisut allat kiffartuullugillu siunnersornerisigut. Volunteer Centerimi, AWG2016-imi kajumissutsiminnik sulisut qitiusumik sullissiveqarfigisaanni, iluarusunnarluinnartumik nuannersunngortitsisoqassaaq.

Special Guests Services

Special Guest Servicesip AWG2016-i sioqqullugu, ingerlanneqarneratalu nalaani, Special Guests/VIP'i (immikkut qaaqusat nuimasullu) pitsaasumik atugassaqtitaanissaat qulakkiissavaa. Suleqatigiinni kajumissutsiminnik suleqataasut VIP-inut kiffartuussineq paasissutissiinerlu suliarissavaat, tikeraat inissaannut inissillugit ikiorlugillu, kiisalu nunat peqataatitaqartut angalaqatigiivisa aqutsisinut siunnersuisassallutik.

Team Medical

Ajutoormik pisoqarpa? Unammiaarnerit ingerlanneqarnerisa nalaanni ikiueqqaarnermik suliaqartussanik amerlasuunik pisariaqartitsisoqassaaq. Kajumissutsiminnik suleqataasut, ikiueqqaarnermut allagartaqanngitsut, unammiaarnerit sioqqullugit akeqanngitsumik pikkorissartinneqassapput, Team Medicalimi suleqataasinnaangorlutik piginnaasaqalersillugit.



Team Venue

Sumiiffiit pisoqarfiusussat – biilnut unittarfiit, timersorfiit, aaqqissuussat aamma ataatsimiittarfiit – unammiaarnerit nalaanni pitsaalluinnartuussapput. Team Venuemi kajumissutsimik suleqataasutut nerisarfinni aamma timersornermik kulturikkullu aaqqissuussiffini ataasiakkaani suliaasanik suliaqassapput.

Team Sport

Timersorneq nuannarisarilluinnarpiuk? AWG2016-imi timersuutit makku unammissutigineqassapput: Sangusaarluni sisorarneq, Sisoraaserluni oqattaasarneq (biathlon), Aputisiuserluni oqattaasarneq, Ujakkaarneq, Aputisiuserluni arpaneq, Snowboard, Sulorarneq, Basketball, Futsal, Nerrivimmi arsaaarneq, Volleyball, Inuit pinnguaataat, Eqqillit pinnguaataat aamma Paaneq. Ataatsimiitaliani timersornermut tunngasunik suliaqartuni kajumissutsiminnik suleqataasut unammiaarnerit piareersarnerinut ingerlanneqarnerinullu ikiuutissapput, soorlu piffissanik allattuilluni, angusanik nalunaarsuilluni aamma timersortarfinnik piareersaalluni/aserfallatsaalluni, suliaasanillu allanik ikiuulluni.

Team Logistics

Timersortartut sumi nerissappat, sinissappat aamma kia paarissavai? Peqataasussat najugaqarfissaasa atuarfiit piareersarneri, aamma tamaaniinnerminni paasissutissinneqartarnissaat ikiorneqartarnissaallu Team Logisticimi kajumissutsiminnik suleqataasut peqataaffigissavaat.

Timersortartut tikeraarnerminni toqqissisimanissaat anguniarlugu atuarfinni, timersorfinni- aamma kulturikkut pisoqarfinni isumannaatsuutitsinissaq kajumissutsiminnik suleqataasut aamma peqataaffigisinnaavaat. Nerisarfinni sassaalliineq, piareersaaneq torersaanerlu aamma kajumissutsiminnik suleqataasut suliarisinnaavaat.